

厚齋易學

一九



欽定四庫全書

厚齋易學卷三十八

宋 馮椅 撰

易外傳第六

象上贊

泰至觀

天地交泰后以財成天地之道輔相天地之宜以左右
民

后君也天子諸侯之通稱財今裁相去聲左右今佐
佑天之氣下交於地地之氣上交於天天地之氣中

和所以為泰也為君者於是以天地造化之運財而成之然後隨其所宜輔而相之凡以左右扶翊天下之民由其道遂其宜無過不及以歸於中和也財成謂一歲則財成春夏秋冬四時則財成孟仲季三月一月則財成二節六候而輔相左右則如堯典之羲和呂春秋之月令是也毛伯玉曰乾坤相交和之至也陰陽適停中之至也由中以為和由和以為泰財成說本朱子

拔茅征吉志在外也

拔茅征吉初九象占志在外也泰三陰三陽以交為義不為二三陽爻所隔與四相應志於上復故曰在外

包荒得尚于中行以光大也

包荒得尚于中行九二象占以光大也舉上下二句則全爻之義皆在其中泰之為卦莫尚此爻故曰光大陽明中正之象

无往不復天地際也

无往不復九三象天地際也交際之際

偏偏不富皆失實也不戒以孚中心願也

偏偏不富六四象占皆失實也皆者三陰同志之辭
陽為實上卦皆无陽故曰失實不戒以孚占中心願
也二陰樂於下復

以祉元吉中以行願也

以祉元吉六五占中以行願也得中則吉女之有行

生而願為之有家也六自五而復二猶女子之行歸於夫家乃所願也

城復于皇其命亂也

城復于皇上六象其命亂也事至於更則其邑人已不聽命矣亂謂不歸一也

天地不交否君子以儉德辟難不可榮以祿

都聖與曰天地不交之時陽已事而擎斂不榮其末而將反其本故君子法之朱子曰收斂其德不形於

外以辭小人之難人不得以祿位榮之毛氏曰自象
言之則以不交為否因其象而用之則以不交為宜
遠而去之如天地之相絕所以身名俱全也李季辨
曰君子處亂世之道程可久曰畏小人之禍也使人
懷此心則傾其否者誰乎六爻之間君子之可以有
為者不一而足也竊謂可以有為者在位之君子不
交而退辟者在下之君子唯其時物也

拔茅貞吉志在君也

拔茅貞吉初六象占志在君也乾在上君道也志於
上交非謂九五

大人否亨不亂羣也

大人否亨六二占不亂羣也語曰入鳥不亂行入獸
不亂羣郭子和曰不亂羣者如鷹鸛鳥雀必不可同
羣伯夷不立於惡人之朝不與惡人言是也

包羞位不當也

包羞六三象占位不當也不當則不安其位故包二

陰以進

有命无咎志行也

有命无咎九四象占志行也荀氏謂曰志行乎羣陰
大人之吉位正當也

大人之吉九五占

否終則傾何可長也

否終則傾釋上九傾否

天與火同人君子以類族辨物

天與火同人正義曰天體在上火又炎上此其同也
因六二中在人故曰同人張舜元曰乾離謂之同人
氣皆上行陽也陽為善故以无所不同為亨有所同
為吝坎坤謂之比氣皆下趣陰也陰或流為不善故
以有孚比內比賢顯比為吉匪人為傷君子以類族
辨物唯六二一爻為陰物五陽族皆陽物也當類其
族而辨其物則同人者衆陽之族君子之道乎六二
之族猶非此族也不在祀典之族物猶是其生也與

吾同物之物以類推之則知君子之族為君子小人之族為小人士夫之族為士夫農之族為農工商之族為工商皆其物也倮族為倮物羽族為羽物毛族為毛物鱗介之族為鱗介之物類其族者乃辨其物若比而同之是墨氏之學而孟子辭而闢之者也出門同人又誰咎也

出門同人初九同人於門之象又誰咎也誰能咎之蓋出門而有遇即同之非有所擇也

伏戎于莽敵剛也三歲不興安行也

伏戎於莽九三象敵剛也剛謂九五三歲不興占安行也所以三歲之久雖不興而亦不解者行之安耳此猶居之不疑與自以為是者也

乘其庸義弗克也其吉則困而反則也

乘其庸九四象義弗克也能乘其庸非力之不能攻也乃義弗克攻耳義謂陰陽相應之正義其吉占則困而反則也有物必有則物皆然心為甚夫婦有義

有別乃其則也困者困於義之弗克故反於夫婦之則耳已非二之正應是强暴侵陵義所不可四位陰有困反之義

同人之先以中直也大師相遇言相克也

同人之先謂九五號咷之象以中直也不言中正而言中直者由中而其義直乃為三四所間故發於憤激大師相遇占言相克也王介甫曰言兩剛之盛欲克五五中直能克之

同人于郊志未得也

同人於郊上九象志未得也其志在二而相遠非應故未得不曰不得者以五陽皆應一陰有一爻之不應非大同也特有遠近之異故未得其志耳

火在天上大有君子以遏惡揚善順天休命

火在天上大有程可久曰陽氣位乎天德之時萬物盛多故曰大有或謂所照者廣然離在天成日在地成火今在天上而不言日則不取照義君子以遏惡

揚善順天休命過於葛反止也休美也善惡无所不
有故為大有天命有善而无惡故曰休命止遏其惡
然後乃揚其善所以順天之休也朱子曰反之於身
亦若是而已矣李仲永曰天命在我故可以遏惡揚
善非若同人別白是非而已竊謂君子蘊離火之明
故能分別善惡順乾天之命故能遏惡揚善

大有初九无交害也

大有初九无交害也以爻義明初九之象當大有之

初乃无上下之交豈不有害於大有之義乎

大車以載積中不敗也

大車以載九二象積中不敗也明有攸往无咎之占
乾剛之中而健於行故積重於中而不撓敗以中明
大車以載之義

公用亨于天子小人害也

公用亨于天子九三象小人害也以害明弗克之占
謂小人則專其有而害於職貢之義